

Zapóslane

Na čitarski list Jana Nuka „Wostajmy cyrkej we wsy“, wozjewjenym w SN z 31. januara, pisataj rěčnikaj iniciatiwy Serbski sejm dr. Měrcin Wałda a Hanzo Wylem-Kell:

Nětko mamy hižo čitru rozmołwu w nowinje. Awtor w swojim Zapóslanym samo měni, zo sej „kóždy, hač Serb abo Němc, kotryž so na dobro serbstwa angažuje, respekt a připóznaće zasłuža. Tole płaći bjezdweła tež za akterow kubłanskeho wjerška 14. januara w Budyšinje.“ Zdobom Nuk cyle prawje zwěsća, zo steja prócowanja iniciatiwy tež přeco zaso na agendže Domowinskeje džěławosće; naliča tam wotpowědne zaměry a dóńdže k facitej, zo běchu „nažel ... prócowanja dotal njewuspěšne“. Na to wupraja přeće, „zo akteroj Serbskeho sejma we wobłuku Domowiny za zwoprawdženje swojich idejow wabja“.

To je namaj kaž z wutroby rěčane. Wězo njemóže a njeměł niktó nikoho k něčemu nuzować. Za to je zjawna zhromadna rozmołwa Domowiny a iniciatiwy Serbski sejm najfairniša přiležnosć. Wosebje njedawno powołana nowa rada starostow sej přeje, zo započnu wšitcy w serbskich naležnosćach angažowani sej ideje wuměnjeć. Rada je wosebje tohodla nastupiła, zo by dowěru mjez Serbami a jeje politiskimi akterami přisporjała. Jenož tak móžemy za jedyn postronk čahnyć.

Wjetši dyžli prjedy je zajim, problemy a šansy pomjenować a je rozrisać, ma-li kóždy móžnosć, zjawnje sobu rěčeć a sobu rozsudžeć. Tohodla naju poskitk Jana Nuka zwjesela. Radlubje jón přiwozmjemoj.

Iniciatiwa Serbski sejm je zwólniwa k hnydomnej zjawnej rozmołwje. Namjetujemoj, zo so ručež móžno do njeje podamy. Zo by kóždy móžnosć k tomu měł, hodži so najlěpje sobota, a to 4., 11. abo 18. měrca. Wjeseimoj so na zwólniwość Jana Nuka k wuměnje mysłow a idejow. Nadźijepołnaj čakamoj na wobkrućenje jednoho termina.